



度支奏議目錄

廣東司一卷

題議裁汰本部冗員疏

題主事盧世淮終養疏

題叅梁應科假印移咨疏

覆兩廣總督粵中多盜多稅疏

題香價發明商人告擾疏

覆廣東督按題新會二都改屬疏

會題總理公署疏

再題總理公署疏

題郎中張朝綱請復俸級疏

度支奏議卷之二

太子太保戶部尚書淄青畢自嚴視草

題議裁汰本部冗員疏

題爲欽奉

聖諭事廣東清吏司案呈奉本部送准吏部咨稱崇

禎二年正月二十五日該司禮監傳出

聖諭朕覽該部所奏各官會典原額及今見任員數
內外衙門自有定制後乃增設累累或一署多至
數人殊爲冗冒夫設官以辦事乃爲人以設官曩

來弊習亟宜釐正爾部卽行兩京各衙門及在外
撫按官嚴加查覈或因事增設聽事定酌議其餘
俱着程量悉去駢贅務但官省事清各修厥職稱
朕責實圖治至意特諭欽此欽遵移咨到部該臣
等看得本部職司天下財賦之登耗會計京邊
糧餉之出入事屬最要分屬最夥

國初建制以來員額亦時有增減要以官因事設
事不廢而官不駢

會典之所開載可考鏡也

舊制尚書一人左右侍郎各一人總督倉場或尚書
或侍郎一人任大責重尚矣其分屬司照二廳
浙江等十三司俱照

會典開載額設司務二員照磨一員簡較一員浙
江司郎中一員員外郎一員主事四員江西司
郎中一員員外郎一員主事四員湖廣司郎中
一員員外郎一員主事四員陝西司郎中三員
員外郎一員主事四員廣東司郎中一員員外
郎一員主事二員山東司郎中二員員外郎一

員主事三員福建司郎中一員員外郎一員主事四員河南司郎中一員員外郎一員主事四員山西司郎中四員員外郎一員主事四員川司郎中一員員外郎一員主事三員廣西司郎中一員員外郎一員主事二員雲南司郎中三員員外郎一員主事三員共九十員內除掌印正郎十三員在部辦事其餘各官俱循例照俸序官內外倉場邊鎮關津等差及監兌催解各項錢糧遼餉銀兩不時差遣鱗次題委事有專責例無紊越尚有

會典未載而因事增設者如本部添設石侍郎一員督理京省錢法又添設寧遠東江餉司郎中各一員雖非

祖制而事關緊急亦不宜裁僅有添註湖廣司郎中一員山西江西司員外郎各一員浙江陝西山東福建司主事各二員江西河南廣西司主事各一員共計十四員原非額設之數並行裁革

又添設寶泉局一差無論各司副郎主事俱可
管理今該差帶銜山東司郎中苗自成已經差
滿見將

會典額內各官輪差永爲定例俟苗郎中陞轉之
日不必題補此外尚少額設湖廣司主事一員
相應銓補以昭

皇上法

祖定制其應裁各官應俟俸滿遷轉及遇實缺填補
所遺本缺卽行開除永不銓選庶官無曠職之
嫌事有畫一之規可以仰副

皇上裁汰冗官責成實效之盛心矣相應

請恭候

命下臣部移咨吏部遵奉施行

崇禎二年四月十三日具

題本月十六日奉

聖旨是欽此

題主事盧世淮終養疏

題爲親老難離情深陟屺思恩俯准歸養以全子
道事廣東清吏司案呈奉本部送據江西清吏
司主事盧世淮呈稱竊念職生不辰十齡而孤
鞠育教思惟母紀氏是賴艱辛備嘗幸博一第
恭遇

朝廷浩蕩之恩

勅封職母爲太安人捧檄戲綵大慰烏哺之私正宜
朝夕策勵以報答

度支奏議

廣東司一

五

國恩何敢言去惟是職母老矣年七十有八矣迎
養不能絕倨不忍又愛職最篤餐眠起居相倚
爲命職昨奉差過里依依膝下聞職遠遊揮淚
如雨職所以星言夙駕急於復
命者正欲控此一段苦情耳查得

大明會典一款親老而兄弟在外無人侍養者許放
回侍養職止有兄一人體素羸弱善病經年就
醫在外痊可無期不能遄歸職母念子倚間而
望定省何人今又查得原任四川道御史王

英陳情乞養得徼

聖慈職之情事與例相合伏乞憐職母老鑒職情迫
代爲題

請照例准歸侍養庶人子依親獲少伸其愛日而老
母戀子可稍延其餘年矣等情到部奉批准照
例代題奉此本司案查得

大明會典一款嘉靖十三年奏

准親老而兄弟在外無人侍養者許放回終養十五
年奏

准親老雖有兄弟篤疾不能服事者准令終養今據
本官具呈前來猶恐不的行准本官同察本部
山東清吏司郎中范鑛同鄉本部陝西清吏司
郎中董嗣諶各不扶印結前來案呈到部該臣
等看得主事盧世淮器局恢弘才情璀璨方倚
分理於錢穀乃迫烏哺於庭闈蓋不以軒冕之
榮而易其菽水之歡厥情綦真厥品亦卓所當
亟爲曲成以崇孝道而維風化者也旣經該司
查有前例相應具題伏乞

勅下吏部照例覆

請准令本官侍養俟親終日給文赴部聽用遺下員
缺另行銓補

崇禎二年四月十六日具

題本月十九日奉

聖旨吏部知道欽此

題叅梁應科假印移咨疏

題爲假印非法據實叅究事廣東清吏司案呈照
得吏役閻撥冠帶乃銓部職掌其收叅起送則
該管衙門專責如本部所屬倉場都令攢典當
該一應收叅食糧掛號起送向係本司總轄定
制昭然誰敢屑越今查得本年六月十三日有
神奸梁應科並不經繇本司掛號起送輒冒本
司印文內開係山西長治縣人閻定邊衛西倉
攢典頂姚可大名缺崇禎元年五月十四日着

後扣至二年五月十五日後滿起送等因徑投
吏部考功司希箇冠帶本司訪知事屬不法卽
向考功司查取原文前來磨對并非本司起送
委係假冒似此僞竊

一命之榮弁髦三尺之法雖云么麼小吏實乃膽大
包天事干詐僞法難容隱本司職掌攸關理合
呈明等因案呈到部該臣等看得

國有分署事有專責

祖宗設立定制所以防假冒而杜奸弊者至詳慎也今
梁應科不知何物么麼輒敢懷奸弄法僞造臣
部廣東司印文開列定邊衛西倉攢典名色捏
稱役滿起送徑投吏部考功司巧箇冠帶若非
該司覺察舉呈幾於墮其奸術矣夫職無崇卑

總關

朝廷名器此印可假則將何所不假乎近聞假印盛
行恐詐冒冠帶者不獨一梁應科其爲銓政之
蠹不小也合無以後將臣部所轄一應役滿起
送各吏如遇題授冠帶屆期令考功司查照外

府州縣給繇考滿各官事例詳開各役姓名履歷先行移咨臣部轉行該司逐一磨對有無詐僞照名登答明白咨回方准題授毋再如梁應科之假冒則題授得真而選法亦清矣爲此具題伏乞

勅下法司將梁應科速提究問正罪并行吏部一體遵奉施行

崇禎二年七月十四日具

題本月十七日奉

聖旨梁應科著法司提究後滿題授移咨磨對等事申飭行該部知道欽此

覆兩廣總督粵中多盜多稅疏

題爲粵中多盜繇於多稅謹備陳情節仰祈

聖鑒以奠海邦事廣東清吏司案呈奉本部送戶科
抄出總督兩廣軍務兼理糧餉帶管鹽法兼巡
撫廣東地方兵部右侍郎兼都察院右僉都御
史王尊德題前事等因於崇禎三年二月十六
日奉

聖旨東粵原無他稅何得誨盜起妖還着地方官加
意撫戢所請南海虛稅卽與查議具奏該部知道

欽此欽遵抄出到部送司案呈到部該臣等看
得民之走險爲趨利也法之不飭盜之困也粵
省號稱膏沃商帆買舶翔集之地陽山砮石可
以燒鉛尤爲奸民之所睨視故粵爲利藪亦盜
藪也自稅使報罷以來歲所徵

公府之稅曾復幾許而地方假以爲名逐處橫征
至難枚舉佐領之鑽營棍徒之承攬攘臂而趨
實爲盜竽妖誣鼓煽而乘之又何誅焉今督臣
洞矚釁源力爲釐飭痛懲其漏稅者而嚴禁其

旨奉將

私稅者地方幸獲安枕茲又奉有加意撫戢之
德意而與之以休息在督臣饒有忠猷無煩臣部之
贅及也至所請南海定亏虛稅一節

國計民生實相關切不得不細加詳察爲照定亏
虛稅坐落南海縣境勢居海濱坵場日久有糧
無地至萬曆九年間該省清丈已失去原額二
千二百二十八頃歲該額輸糧銀七千七百八
十餘兩比因版籍難更

國課不可虧缺撫粵者隨在該縣實田內從權每
畝加虛稅一分六釐四毫貽累迄今節年輸納
不前該省議將抵除香山魚課等銀一千二百
四十三兩零外議以新會香山等縣新生沙灘
補之而屢年各縣官民紛紛爭執不肯移抵南
海士民苦累多年今見查造賦役全書適當萬
方昭蘇之會督臣所以爲該縣請也顧

國家財賦原有定額能減于額以外之科歛必不
能減于額以內之輸納且濱海州縣之地坵于

此者長于彼不獨粵省爲然夫盈虛損益天之
道也國之經也南海之缺額經今五十餘年矣
該省新淤之沙如新會香山等處當復不少豈
真海濱終不可闕乎但事在彼中未可虛揣是
在該督撫按乘此清查之時加意講求從長計
議務期斟酌停妥租賦確有着落上不病
國下不病民乃爲經久永賴之道也旣經該省督
臣具題前來相應覆

請恭候

命下臣部移文兩廣總督及咨都察院轉行廣東巡
按御史勒限覆勘明白詳議具奏
定奪施行

崇禎三年二月二十四日具

題本月二十七日奉

聖旨東粵賦額有定既稱虛稅應免當以何項抵補
該部卽行會該撫按確議具奏欽此

題香價發明商人告擾疏

題爲香價給發已明商人復滋告擾謹請註銷以
杜濫觴事廣東清吏司案呈案照崇禎元年十
月內據

御用監題辦

聖駕郊

天香品奉

旨科抄到部送司奉此隨該署印主事王國祚查得
郊

天香品據

御用監題辦數目比照天啓三年減半成造計照
當年舊案價值該銀壹萬八千兩隨即說堂先
給十分之六共給過商人徐富錄等一萬八百
兩續該科院覆估裁減原價三千有奇止該存
價一萬四千九百一十五兩六錢五分二釐五
毫自辦完恭

進後各商卽索找價紛紛告擾復奉堂諭備查天
啓三年郊

天香價科筭彼時全副香料共銀三萬五千九百九十
一兩零止給銀一萬七千九百九十六兩今計
領過一萬八百兩若比前例已多領銀一千八
百兩似難藉口再行找給呈乞題
請註銷等因案呈到部該臣等看得物有定數價有
定額如崇禎元年郊

天香品先據該監舊案該價銀一萬八千兩續經科院
估減存價一萬四千九百餘兩隨據該司署印
主事王國祚恐誤

典禮呈請預支二次共發銀一萬八百兩幸於事而竣矣及查天啓三年香品原係全料曾經科臣朱大典叅駁前任尚書李宗延止與價銀一萬七千九百九十六兩僅及五分而止今給價已六分比照天啓三年尚多銀一千八百兩卽不使於追補似亦無容覬覦矣若復曉曉告給卽令奸人之腹無厭倘有以天啓三年已事詰問者臣部將何以應之其未領價銀四千一百一十五兩六錢五分二釐五毫相應題

請註銷以杜告擾蓋苦累宜卹而冒濫亦宜防臣部不得不爲慎重者也恭候

命下臣部遵奉施行

崇禎四年五月初七日奉

聖旨這香價不必續給准註銷欽此

覆廣東督按題新會二都改屬疏

題爲退荒利病宜覈微臣見聞頗悉懇乞

聖明省覽俯賜採納以資實用以銷隱憂事廣東清
吏司案呈崇禎四年八月初二日奉本部送戶
科抄出兩廣總督王業浩會同巡按廣東監察
御史高欽舜題覆江西道監察御史吳裕中議
將廣東新會縣平康得行二都就近改屬恩平
新寧二縣今該省詳酌咸稱割地分民輿情不
安具題免行改屬仍舊緣繇本年七月二十九

日奉

聖旨戶部知道欽此欽遵抄出到部送司奉此查得御史吳裕中前任廣東廣州府順德縣時署攝新會縣篆因偶值荒年該都錢糧追徵爲艱乃咎地遠所致後隨題

請二都就近割隸寧平二縣奉

旨下部議覆本部詢之彼中士紳咸稱不便具題行令該省督按酌議應否改屬業奉

欽依移咨酌議去後今該省督按行令司府各縣及

里排人等查酌其宜稽之輿圖採之公論咸以恩平地去該都較本縣不啻倍遠且拆割嶺西道不便可知而新寧之去該都則舟楫難通重山疊嶽行道峻險不如本縣水陸之坦夷也況當立縣之初籌度形勝稽合民籍慮始之計必有定見而議論紛紛終爲築舍道傍今兩都之民願安其舊况輸納無二則變亂宜寢相應依擬具覆案呈到部看得立邑分疆界限自有定址隸籍編賦版章不便紛更如新會縣之平康

得行二都緣地連新寧恩平二縣兩都細民先
年因值歲歉錢糧不無拖逋時則前臺臣吳裕
中兼攝此邑故建議就近改屬寧平二縣以就
徵此亦急公之一念也今查該省督按二臣原
疏內稱鄉民胡泰謝朝明等具呈二都割隸其
便者十一其不便者十九願安

舊都以免變遷况今年歲豐登輸將金無梗令
二都所完之糧與各都圖無異若再更張翻令
姦頑首鼠兩端倖希逋負未得其利而先受其
害宜該省有仍舊貫之說也既經該省督按二
臣會題前來相應依擬覆

請恭候

命下臣部移咨該省督按衙門一體欽遵

崇禎四年八月初十日具

題本月十三日奉

聖旨新會縣都照舊不許紛更欽此

會題總理公署疏

題爲懇

請公署以便蒞任事廣東清吏司案呈崇禎四年十
月初四日奉本部送戶科抄出

欽差總理戶工兩部一切出入錢糧事務司禮監監
官太監張彝憲題稱臣叨

特簡總理戶工兩部錢糧事務冊籍殷煩內外有體
戶工不能兼蒞以承其事必得定所方可按冊
細查清心理劇矧關錢糧重務姦宄易生隄防

宜密伏乞

勅下戶工兩部衙門或議設立公署或修葺空閑房
廠立一定所以供職業始上不負

聖恩之專委下肅司屬之觀瞻矣等因崇禎四年十
月初二日奉

聖旨該部知道欽此欽遵抄出到部奉此該初五日
隨即呈堂移咨工部會查間本月十一日准工
部回咨屯田清吏司案呈奉本部送准戶部咨
稱奉

旨添設內監總理該監題請設立衙門查係事隸兩
部其衙門處所或議立公署或修葺空閑房廠
今當作何議處等因到部蒙批兩部各尋覓空
閒房廠奉此隨即行令作官房牙尋覓去後今
據回稱尋有耿內相閒房一所計一百三十間
價銀三千三百兩坐落北城鑼鼓巷地方等情
到司已經會同戶部廣東清吏司郎中袁文新
踏看明白堪為公署相應咨覆煩為查照往例
動支戶工三庫銀兩召買題覆等因到部相應

據議酌覆案呈到部該部等查得天啓七年間內臣徐文輔總督戶工一部庫藏錢糧所需公署原用價銀六千兩及造又費過銀二千餘兩共銀八千餘兩之數但係新舊太倉二庫與節慎三庫均發後文輔去任公署空間比於崇禎二年二月內該今新總理內臣前任

德陵提督張彝憲

題請

德陵菓廠工臣張鳳翔覆奉

聖旨德陵菓廠將徐文輔原設公署與做不必另議改設欽遵在案第今公署事急既經該司官會同工部屯田清吏司郎中許九臯踏看得北城閒房一所計價三千三百兩較之昔年費不爲奢唯是民間住房視公署規制大不相侔必須改作始可供用然土木之工所費實繁而時日亦復耽延該臣等酌量緩急擬爲省便速成之計合無將

德陵菓廠仍爲公署體統具備不煩改作畧加修飾

便可駐劄其

德陵菓廠或將北城新覓閒房買抵合用價銀并兩處修理之費仍照前例令三庫均派給發總候事竣

奏銷庶廠署各適其宜而節省亦有成效矣謹合

詞具

請伏候

聖明裁奪

勅下二部一體遵奉施行

崇禎四年十月十四日具

題本月十八日奉

聖旨公署着速行另置欽此

再題總理公署疏

題爲懇

請公署以便蒞任事廣東清吏司案呈崇禎四年十月二十一日奉本部送戶科抄出本部會同工部題覆設立總理戶工兩部內監公署緣繇崇禎四年十月十八日奉

聖旨公署著速行另置欽此欽遵抄出到部送司奉此遵於本日具稿呈堂移咨工部會查去後二十五日准工部回咨屯田清吏司案呈本部送

准戶部咨會前事等因到部送司奉此隨即行
令坊官着落房牙尋覓去後今據房牙張成等
回稱尋有耿內監房一處共計一百三十六間
價銀二千六百五十兩坐落中城小時雍坊五
舖乾石橋迤南等情到司會同戶部廣東清吏
司郎中袁文新踏看明白堪爲公署煩爲查照
酌覆等因到部相應據議酌覆案呈到部該臣
等隨復會同工部尚書曹珍等覆議得總理公
署亟應翔置誠不容時刻緩者臣等前疏議仍

用

德陵菓廠蓋出一時膚見謬爲省便速成之計正欲
取自

聖裁今蒙

皇上慮先經始

特勅另置臣等恭奉

綸音祇行恐後今據該司郎中袁文新會同工部屯
田司郎中許九臯踏看得中城乾石橋地方閒
房一所坐落遠近已自適中價值二千六百五

十金亦不甚夥仍應改造頭門以肅觀瞻至于
廳堂廊廡止行修飾便可駐劄合用房價并修
理之費仍照舊例令戶工三庫均派給發總俟
工完奏銷庶公署另置得宜而

欽命不致久稽矣謹具疏恭

請伏乞

勅下總理內臣及戶工二部一體遵奉施行

崇禎四年十月二十六日具

題本月二十九日奉

聖旨依議欽此

題郎中張朝綱請復俸級疏

題爲懇恩遵例題

請復俸以昭激勸事廣東清吏司案呈奉本部送據
浙江清吏司郎中張朝綱呈稱竊照職自承乏
戶曹奉差三次一差江北催餉鳳淮積逋地方
三閱月而二十七萬餘銀盡完再差南新倉監
督以節省倍多奉

旨紀錄三差浙江監兌職親雇募民船裝運糧米及
京遼錢糧毫無遲悞止緣誤薦運糧把總王化

行奉

旨降俸一級照舊管事職之薦敘緣京浙相隔不知此弁舊有掛欠至崇禎四年四月內以郎中到任迄今計筭一年十一個月朝夕兢惕時無寧晷業將該省各項本折錢糧不避勞怨節次題叅申飭又經絡繹咨提及差人守催共計完過本省金花銀二十九萬九千有奇俱足色數驗收訖又完過京邊太倉等銀九萬九千有零光祿寺果品等銀四千三百有零承運庫本色絹

二十五萬四千有奇丙字庫絲綿三十一萬九千四百兩零供用庫酒醋局光祿寺等衙門白糧米四年分完過六萬五千七百石五年分完過六萬四千石以上完過各項錢糧俱職竭歷催僭微勞固不敢言功格外覲敘今查兵部司務楊三宅因武闡督箭致降俸一級後本官微勞近經兵部題復訖茲職以誤薦受罰又經兩次前除與楊三宅例相符伏乞垂念末員十八年之資六年二個月之俸功過相準俯賜具題

開復庶收桑榆後効且昭勸懲

大典等情到部奉批廣東司查議具題開復奉此查
得本官先差江北催餉三閱月起解頗多次差
督南新倉以節省奉

旨紀錄繼差浙江監兌奉

旨雇募民船及催漕糧京遼輕賚等項俱各早竣祇
緣京浙隔遠不知領運把總王化行舊糧有欠
誤薦本弁於崇禎四年四月內奉有

明旨念催餉已多完解姑降俸一級照舊管事欽此

遵行在案及查崇禎五年九月初六日吏部署
部事左侍郎曾楚卿等題爲遵例懇題復級以
宏鼓舞事內稱崇禎三年六月二十四日本部
題爲

明綸久渙官秩宜明敬循職掌恭請

聖裁以便遵守事六月二十七日奉

聖旨降級管事原示薄懲以需後効果能盡職補過
不妨復秩優遷若槩用原官陞轉何名裁抑這所
奏着條議妥確着明規則來看欽此欽遵議得諸

臣從降級後仍有職業不修悠忽視事者卽應從已降職銜再議處分有痛自刻責數月省躬一心集事者應先復原職後議遷轉有感恩圖報望實日著勞勩可嘉者還應從原職優擢以彰

朝廷不測鼓舞等因於七月初七日奉

聖旨這條奉降級管事三則依議行還須嚴核功實毋得但立規則按月序遷以啓倖門欽此欽遵今照郎中張朝綱降俸一級管事

聖恩原示薄懲茲本官回部任內催督錢糧甚多懲艾已久查與兵部司務楊三宅事例相符似應准其題

請開復等因案呈到部該臣等看得本部浙江司郎中張朝綱前任浙江監兌因誤薦漕運把總一員

欽蒙降俸一級今回部後督催絹綿京邊等項俱已足額而白糧金花二款完尤獨早薄降已闕三年湔除又經二次賢勞可錄微過堪原揆以之

部原題之則似應在復職遷轉之列近查兵部
司務楊三宅曾因武闈督箭降俸旋亦題復朝
綱事例正與三宅允協相應題

請恭候

命下吏部酌議賜復俸級是亦

聖明激勸後効之一端也

崇禎六年二月初二日具

題本月初五日奉

聖旨吏部知道欽此

程